



Број/Број: 01/6-50-1-6-21/09  
Сарајево/Сарајево, 18.03.2010.

## Z A P I S N I K

### **21. sjednice Komisije za ostvarivanje ravnopravnosti spolova, održane 18. 3. 2010.**

Sjednici Komisije za ostvarivanje ravnopravnosti spolova, održanoj 18.3.2010., prisustvovali su članovi: Vinko Zorić, Vesna Šain, Mirjana Malić, Remzija Kadrić, Sead Jamakosmanović, Nermina Zaimović-Uzunović i Halid Genjac.

Sjednici su prisustvovali i Samra Filipović-Hadžiabdić, direktorica Agencije za ravnopravnost spolova BiH, i Zvonimir Kutleša, generalni sekretar Vijeća ministara BiH.

Sjednici je prisustvovao i sekretar Komisije Davorin Semenik.

Za sjednicu je usvojen sljedeći

## DNEVNI RED

1. Usvajanje Zapisnika 20. sjednice Komisije;
2. Razmatranje Izvještaja o radu Vijeća ministara BiH za 2009. godine;
3. Razmatranje Prijedloga zakona o izmjenama i dopunama Izbornog zakona BiH;
4. Razmatranje Informacije sekretara Komisije o posjeti delegacije Komisije gender komisijama u Zapadnohercegovačkom kantonu, 4. 3. 2010.;
5. Međunarodna saradnja;
6. Ostala pitanja.

### **Ad 1. Usvajanje Zapisnika 20. sjednice Komisije**

Zapisnik 20. sjednice Komisije usvojen je jednoglasno, bez primjedbi.

### **Ad 2. Razmatranje Izvještaja o radu Vijeća ministara BiH za 2009. godinu**

Zvonimir Kutleša, generalni sekretar Vijeća ministara BiH, dao je opće napomene o metodologiji izrade Izvještaja i o njegovom sadržaju, nakon čega je predsjedavajući Komisije pohvalio metodološki pristup i kraći vremenski okvir u kojem je Izvještaj za 2009. godinu pripremljen.

Samra Filipović-Hadžiabdić iznijela je najvažnije značajke iz Izvještaja o aktivnostima Agencije u protekloj godini, te je zamolila za podršku Komisije u vezi s inicijativom za reguliranje procedure u Vijeću ministara BiH kojom bi se svi zakoni dostavljali i Agenciji radi mišljenja o usklađenosti, kao i za jačanje kapaciteta Agencije.

Nakon rasprave, usvojeno je sljedeće

## MIŠLJENJE

Komisija za ostvarivanje ravnopravnosti spolova razmatrala je Izvještaj o radu Vijeća ministara BiH za 2009. godinu u dijelu koji se odnosi na rad Agencije za ravnopravnost spolova BiH, Ministarstva za ljudska prava i izbjeglice BiH, te konstatirala da nema primjedbi na Izvještaj.

S ciljem djelotvornijeg rada Agencije za ravnopravnost spolova i usklađivanja zakona sa Zakonom o ravnopravnosti spolova u BiH i evropskim standardima u ovoj oblasti, Komisija predlaže Predstavničkom domu donošenje sljedećih zaključaka:

1. Predlaže se Vijeću ministara BiH da svojim poslovníkom, u postupku utvrđivanja prijedloga zakona, predvidi obavezu dostavljanja zakona Agenciji za ravnopravnost spolova BiH radi davanja mišljenja o usklađenosti sa Zakonom o ravnopravnosti spolova u BiH;
2. S obzirom na značajno povećanje aktivnosti Agencije za ravnopravnost spolova BiH, potrebno ju je kadrovski ojačati kao i riješiti radnopravni status zaposlenih u Agenciji.

### **Ad 3. Razmatranje Prijedloga zakona o izmjenama i dopunama Izbornog zakona BiH**

Predsjedavajući Komisije komentirao je Prijedlog zakona o izmjenama i dopunama Izbornog zakona BiH koji je trenutno u parlamentarnoj proceduri, te je dao ocjenu da se radi uglavnom o promjenama tehničke prirode koje ne zadovoljavaju potrebe da se ova oblast uredi u skladu s potrebama, a posebno s principima ravnopravnosti spolova prema odredbama Zakona o ravnopravnosti spolova u BiH i međunarodnim standardima.

Nakon izlaganja sekretara Komisije, prema kojem nije moguće amandmandski djelovati na prijedlog ovog zakona na način da se on usaglasi sa Zakonom o ravnopravnosti spolova u BiH, kako je to 2009. predložila ova komisija, Vinko Zorić i Halid Genjac formulirali su, a Komisija jednoglasno usvojila, prijedlog zaključka Predstavničkom domu, s prijedlogom da se, u okviru rasprave o navedenom zakonu, na nastavku 73. sjednice Predstavničkog doma, o njemu obavi rasprava i usvoji sljedeći zaključak:

### **PRIJEDLOG ZAKLJUČKA**

Imajući u vidu veliki značaj Izbornog zakona BiH i potrebu za njegovim sveobuhvatnim preispitivanjem, Predstavnički dom odlučio je da u proceduri razmatranja Zakona o izmjenama i dopunama Izbornog zakona BiH br. 01-02-2-20/10, od 10.2.2010., u njegovoj drugoj fazi napravi izuzetak te dopusti da ovlašteni predlagači podnose amandmane kojima mogu predlagati izmjene i dopune osnovnog teksta Zakona koje nisu obuhvaćene Prijedlogom zakona o izmjenama i dopunama Izbornog zakona BiH.

### **Ad 4. Razmatranje Informacije sekretara Komisije o posjeti delegacije Komisije gender komisijama u Zapadnohercegovačkom kantonu, 4. 3. 2010.**

Članovi Komisije dobili su informaciju uz poziv za sjednicu, pa je nakon rasprave u kojoj su naglašeni najznačajniji akcenti iz razgovora s domaćinima, Informacija primljena k znanju,

uz zaključak da se o posjeti i njenim rezultatima obavijeste entitetske parlamentarne komisije i gender mehanizmi.

#### **Ad 5. Međunarodna saradnja**

Sekretar je upoznao prisutne s aktivnostima na organiziranju susreta sa članovima komisija parlamenata Velike Britanije, Njemačke i Republike Srbije. Komisija je upoznata s pozivom za posjetu Bundestagu, kao i predloženim terminima posjete, pa je odlučeno da se kao termin posjete prihvati 9. juni 2010. te da u delegaciji budu: Vinko Zorić, Nermina Zaimović-Uzunović, Remzija Kadrić i Davorin Semenik.

Istovremeno je odlučeno da u delegaciji koja će u julu posjetiti Veliku Britaniju budu: Vinko Zorić, Vesna Šain, Halid Genjac i Davorin Semenik.

#### **Ad. 6. Ostala pitanja**

U okviru ove tačke sekretar je upoznao članove Komisije sa informacijom da će, 8. i 9. aprila 2010., u organizaciji Agencije za ravnopravnost spolova BiH, biti održan sastanak na kojem treba da učestvuju predstavnici još četiri komisije. Dogovoreno je da će, nakon dobivanja poziva, sekretar kontaktirati članove Komisije radi potvrde njihovog prisustva sastanku.

Nakon što je dnevni red realiziran, sjednica je zaključena u 12,30 sati.

SEKRETAR KOMISIJE

Davorin Semenik

PREDSJEDAVAJUĆI KOMISIJE

Vinko Zorić